

Ms 3667

Carmen Epitaphicum

Inter Solemnem Conductum

Venerandarum Exuviarum

JOSEPHI PRINCIPIS

POŃIATOWSKI

Stanislai Augusti Poloniarum Regis

NEPOTIS

SUPREMI EXERCITUUM POLONORUM DUCIS

ex Elsteranis Fluctibus ad Lipsiam 19. Octobris 1813. retractarum

per triennium in Saxonia et Varsoviae pie servatarum,

tandem 21. Julii 1817. Cracoviam, ad Regia Sepulchra translatarum.

aeviternae memoriae causa

Emissum.

Matysz Władysław Dubiecki

Exr. I, 417

duplikat

506 51726
♦♦♦♦♦

*Ad Regum Manes accessit Principis Umbra!
Heroem comitans Fama scit, ecquis erat?*

Frigidum lethi rediviva virtus
Evenit marmor. Stat avara contra
Fata quaesitum Patriae secundis
Nomen in Armis;

At nec invictos etiam profanis
Cladibus Manes populata, duxit
Inter obscuros Genium JOSEPHI
Parca Triumphos,

Qui nihil visi metuit pericli,
Provocans aequo Proavos Gradiyo,
Miles à primis meditatus annis,
Arma Virumque!

Torva Minois Nemesisque ridet
Sceptra, nec strictas stupuit secures.
Ardet incoctum bene cui severo
Pectus Honesto.

AEaci furvas tremat Ille leges?
Turbidos rerum bene qui ferendo
Terruit casus et iniqua sortis
Pila regessit?

Lenis



W. 380/61



Lenis irarum cupidaeque Vindex
Fraudis, et pulchri sine caede justus
Arbiter, morum volucrisque Cultor
Integer aevi.

Quantus Heroâ rate non dolendae
Nuper emensus spatia ampla Famae
Lucis et vitae stetit innocenti
Navita cursu!

Vir! vacillantis Patriae Column!
Consulens, pugnans, relevans ubique!
Lipsiae campos decoras cadendo,
Norma futuris!

Interim, si quid mea plectra possunt,
Hoc habe, belli metuende Ductor!
Carmen, incisum Tibi dedicati
Pectinis ictu.

Alter hic *Pyrrhus* cubat acer urnâ!
Alter injectis *Agamemnon* armis!
Alter obliquâ clypeatus *Hector*
Nititur hastâ!

Cujus haud muto Cinis e sepulchro
Increpat segnes Comitum catervas,
Inclytis Vindex tumulis et ipsâ
Territat umbrâ.

XXX

Principem nostris laribus faventem
Te cliens olim coluit Vayellus;
Nunc Tuos custos Cineres salutat
Heic venerandos.

Conderis Craci Capitolio, Heros!
Arce avitâ isthac rutila Polonis,
Quâ pares et PATRUUS et SOBIESKI
Mente Penates.

Jure victricem Tibi lenis Hastam
Laurus inserpit, solidamque circum
Volvitur Clavam: grave Militaris
Stemma Gradivi.

Mathæus Dubiecki
Jurium Doctor, Cancellarius Cath: Crac:
Societatis Literatorum Cracoviensium Membrum.

